

Rancangan pembangunan manfaat rakyat

BH ms 6 25/08/2019

Tumpat: Malaysia sudah menumpukan usaha memajukan rakyat termasuk membasmi kemiskinan dan meningkatkan pendapatan sejak Rancangan Malaysia Kelima (RMKe-5) yang bermula pada 1986.

Bekas Pengerusi Majlis Penasihat Kerajaan, Tun Daim Zainuddin, berkata hasil usaha itu, rakyat kini lebih selesa dengan kemudahan infrastruktur seperti jalan dan jambatan berbanding era sebelum merdeka.

Antara dasar diperkenalkan kerajaan sejak RMKe-5 ialah meningkatkan pendapatan dan mengurangkan inflasi supaya rakyat dapat menggunakan wang

dengan lebih baik.

“Sama ada suka ataupun tidak, jika dibandingkan dengan dahulu sampai sekarang, rakyat lebih selesa daripada dahulu. Dahulu mana jalan macam sekarang, dahulu mana ada titi (jambatan) macam sekarang.

“Dahulu kita naik basikal sekarang semua naik kereta, (jadi) takkan tak ada kemajuan? Mesti ada kemajuan,” katanya selepas merasmikan Karnival Koperasi dan Bekwoh (Kenduri) Rakyat anjuran Suruhanjaya Koperasi Malaysia (SKM) di Pantai Geting di sini, semalam.

Yang hadir sama, Timbalan Menteri Hal Ehwal Ekonomi, Dr

Mohd Radzi Md Jidin; Pengerusi Pakatan Harapan (PH) Kelantan, Datuk Husam Musa; Ahli Parlimen Jeli, Datuk Seri Mustapa Mohamed dan Pengerusi Eksekutif SKM, Datuk Nordin Salleh.

Beliau mengulas kenyataan pakar hak asasi manusia Pertubuhan Bangsa-Bangsa Bersatu (PBB) mengenai kadar kemiskinan di negara yang didakwa lebih tinggi berbanding 0.4 peratus yang dinyatakan oleh kerajaan.

Ditanya mengenai pertukaran portfolio menteri, Daim berkata, perkara itu perlu dirujuk dengan Perdana Menteri, Tun Dr Mahathir Mohamad.

Namun, pada masa sama, be-

liau meminta masyarakat supaya terus memberikan maklum balas terhadap prestasi wakil rakyat yang dipilih mereka pada Pilihan Raya Umum Ke-14 (PRU-14).

Terdahulu, dalam ucapannya di majlis itu, Daim berkata gerakan koperasi dikenal pasti sebagai antara platform yang mampu membantu mengurangkan kenaikan kos sara hidup.

Justeru, katanya, SKM perlu memberi fokus ke arah memperkasa pembangunan gerakan koperasi dalam penguasaan rantaian nilai untuk mengekang kos sara hidup tinggi melalui pembabitan koperasi dalam industri pemborongan dan peruncitan.